

Wednesday, October 1, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

INTERNATIONAL DAY OF OLDER PERSONS

Social Welfare Minister Pi Lalrinpuii'n kum upa golden card nei ten sorkar hospital chauh ni lovin Kolkata, Delhi, Guwahati leh Silchar thlengin damdawi in tha tak takah te an hmang thei tawh tih a sawi.

He thu hi vawiina National Programme for Health Care of the Elderly, NHM leh Social Welfare Department tangkawpin Chanmari YMA Hall-a an buatsaih, Khawvel Huap Kum Upate Ni lawmnaah sawiin, Social Welfare Minister chuan ZPM chuan sorkarna an siam hma atanga an au hla chu kum upate dinhmun chawisan a ni ang tih a nih angin, kum 2023-a Sorkarna an chan hnu lawkah tar pension chu cheng 1000 in an dawmkang chho a ti a, hriselna lama kum upa te pawh huam thei tur Mipui Health Care an siam tih sawiin, sorkar hnathawk pension tawh te pawhin an hmang tangkai hle a, an chhungte thlengin an dil sak thei tawh a ti a, kum upa golden card neite chuan sorkar hospital chauh ni lovin Kolkata, Delhi, Guwahati leh Silchar thlengin damdawi in tha tak takah te an hmang thei tawh tih a sawi bawk a ni.

Byte: Social Welfare Minister

Minister chuan MUP General headquarters enkawl tur, multipurpose centre chu Zemabawkah sak mek a ni a, Social Welfare Department enkawlin Ainawn vengah kum upate enkawlina siam niin, district hrang hrangah kum upate enkawlina a awm theihna turin hma an la leh mek a ti a, ram pumah ti tura tih an nih angin, District hospital tinah kum upa te enkawlina tur khum geriatric bed 10 dah a ni a ti a, Civil Hospital, Aizawlah erawh damlo an tam thin em avangin damlo ten khum an inchan thin loh avangin kum upa te tana abika khum siam, geriatric bed pathum vel chauh dah a ni a ti a, Old age pension chu December thleng an pe tawh a, Mizoram Finance department chuan Social Welfare Departmen- ah thla tin pe thin mah se central atanga an hmuh tur a lo kal tlai thin avangin Old age pension chu an sem hma thei thin lo tih a sawi bawk a ni. Vawiina Khawvel Huap Kum Upate Ni lawmnaah hian kum 100 tling chinte hnenah lawmpuina thilpek a hlan a ni bawk.



NATIONAL VOLUNTARY BLOOD DONATION DAY

Mizoram chu hmarchhak biala a thlawna thisen pe tha ber niin, ram pum huapa hmeichhia thisen pe tha ber state a ni bawk.

He thu hi vawiina National Voluntary Blood Donation Day puala Hrangbana College, Aizawl a hmannaah MSACS Project Director, Dr. Jane Rinsangi Ralte

chuan sawiin Mizoram chu a thlawna thisen pekah ram pum huapa ti tha zingah a tel a, hmarchhak bial bikah pheih chuan pakhatna a ni tih sawiin, vawiin hian AIIMS, Delhi-ah Directorate General of Health Services-a national blood transfusion services atangin Mizoram aiawhin Health Department officer in chawimawina hi a dawng a ti a, India ram pumah hmeichhe thisen pe zat chawhrual zaa 5 a nih laiin, Mizoramah chuan zaa 30 a ni a, hmeichhe thisen pek lamah Mizoram chuan ram pumah a ti tha lawr lak a ni a ti bawk.

Byte : Dr Jane Ralte

Khuallian Pu Jeje Lalpekhlua, MLA pawhin thusawiin, kalkhawmte chu an pian leh seilenna Mizoram ti hmingtha tur leh tihmasawn turin thisen pek a ni emaw an theihna zawnah theihtawp chhuah turin a sawm a, thisen vawi 20 chuang pe theite chuan an taksa an ti hrisel a, zuk leh hmuamah an insum vang a ni tih sawiin, thalai kalkhawmte chu mamawhtute tana thisen an pek fo theih nan zuk leh hmuam leh ruihtheihthila insum tur leh ram tana ruihhlo do kawngah theihtawp chhuah turin a chah a ni.

Byte: Jeje Lalpekhlua

Wawiina National Voluntary Blood Donation Day hmannaah hian Mizo hmeichhe zinga a thlawna a thisen vawi 20 pe chin leh College leh University zirlai hmeichhe zinga thisen vawi 10 pe tling tawh te hnenah chawimawina hlan a ni a, kalkhawmte chuan khawi hmunah pawh thisen mamawh te tana a thlawna thisen pe turin an intiam a, a thlawna thisen pek a ni bawk.



TRIBAL SCHOLARSHIP

Nizan September ni 30 khan Ministry of Tribal Affairs atangin kum 2023-24 leh kum 2024-25 Scholarship sum tangkhang cheng vbc 50.42 chu State sum bawmah dah luh a ni a, hemi leh State Matching Share cheng vbc 5.60, a vaiin cheng vbc 56.02 chu vawiiin Finance Department chuan Treasury atangin a pe chhuak dawn a ni.

sScholarship pekchhuah tur chungchangah hian MZP chuan thuchhuah siamin state in pawisa an dawng chu a lawmawm thu a sawi a, a hun taka dawnglo zirlai harsatna tawh tak an awm tih an hriat avangin hma a la reng thin tih sawiin October thla chhung ngei a an sem zawh theih nan hma a la chhunzawm zel dawn tih an sawi bawk.



MAMIT OIL SCARCITY

Tunlai ruahsur nasa in kawngpui atih chhiat nasat avangin Mamit khawpuiah tuialhthei phur lirthei (tank lorry) a kal thei lova, hemi avang hian Mamit khawpuiah tuialhthei (oil-petrol, diesel) a harsa tawh hle a, Tuialhthei filling Station ah alo then hun tur hi ala hriat loh a ni.

Mamit khawpuiah hian tuialhthei hralh leh lakna Indian Oil filling station 1 awmin thla hmasa September ni 18 atang khan hralh tur an nei tawh lova, a black-a zuar thenkhat la awm ve mahse a to hle a ni.

Mamit-a Tuialhthei hralhna hmunpui/Filling Station a thawktute chuan Mamit ah hian tuialhthei te hi Bairabi atangin National Highway 6 atangin an lalut thin a, tun dinhmunah Mamit to Bairabi inkar kawng National Highway 6 chu ruahsur nasat avangin lirthei kal theih loh khawpin a chhia a, tuialhthei phur lirthei tank lorry te pawh an kal thei lova, kawng that hun tur hi ala hriat loh avang leh Tuialhthei hi Aizawl lam kawng National Highway 108 pawh a chhiat tho bakah Indian Oil atangin tuialhthei phurh phalna temporary permit an la hmuh loh avangin an la phur thei lova tuialhthei an neih hun tur anla hre theilo a ni.

Mamit a filling station a thawkte chuan tun dinhmunah diesel lts 300 vel leh petrol lts 700 vel bak an nei tawh loh thu an sawi bawk.



SEVA PARV

Mipui rawngbawl leh sorkar inrelbawlna tha tih thupui a hmangin Prime Minister Narendra Modi sorkarna hnuaiah kum kalta chhung khan hmasawwna kawng hrang hrangin kalpui a ni a.

Tun tum Seva Parv hunah chuan kum 11 chhungin Prime Minister Narendra Modi sorkarna hnuaia hmalakna te han tarlang ila..

Prime Minister Narendra Modi kaihhruaina hnuaia ah India chuan khawvel huap a hruaitu tha tak ani tih a tarlang a, kum 2023 a India in G20 President nihna a chelh khan ram hrang hrang te nen thawhhona nasa tak a kalpui in, ram hrang hrang 20 chuang te nen thawhhona ziaak in remna leh muanna a awm theihnan nasa tak in hma a la a ni. G20 hruaitu nihna hian India ram chu khawvel huap ah phochhuak in, India nunphung leh ziarang hrang hrang te a phochhuak a, sum leh pai thawh chhuah kawng ah pawh hma a sawn nasa hle a ni

